

憲

章

錄

憲章錄卷第十二

洪武三十
一年戊寅

三十一年春正月己酉朔 上以山東河南民多惰
於農事以致衣食不給乃命戶部遣人材分詣各縣
督其耕種仍令籍其丁男所種田地與所收穀粟之
數來聞 二月 定吏員出身事例皆以九年考滿
出身 三月 上諭吏部臣曰用人之道在於隨材
任使則天下無棄人矣又曰觀人之法有數等材德
俱優者上也材不及德者其次也材有餘而德不足
又其次也苟二者俱無此不足論矣若逐勢變移好

作威福言是而行非此小人不可用也 夏四月

罷回回欽天監 己丑享太廟畢 上步出廟門徘徊

回顧立指桐梓謂太常寺臣曰往年種此因感愴泣

下又曰昔太廟始成遷主就室禮畢朕退而休息夢

朕皇考呼曰西南有警覺即視朝果得邊報祖考神

明照臨在上無時不存爾等當祭祀宜加敬慎日暮

中使供灑掃奉神主恐有不虔當以時省視務令齋

潔以安神靈 五月 甲寅 上不豫 庚申置成

都重慶保寧三府及播州宣慰司茶倉四所命四川

布政司移文天全六番招討司將歲收茶課仍收碯

門茶課司餘地方就送新倉收貯聽商人交易及與

西番市馬 進齊恭爲兵部尚書 上嘗召恭問邊

將姓名恭歷數無遺又問諸圖籍恭出袖中手冊進

簡要詳密上大奇之 閏五月 乙酉召齊恭受顧

命輔皇太孫 上崩於西宮壽七十一遺詔皇太孫

嗣位 辛卯皇太孫卽皇帝位詔曰天降下民作之

君我皇太祖高皇帝受天明命統有萬邦宵衣旰食

弘濟斯民凡事有益于天下者無所不用其心政教

休明規模宏遠朕以眇躬纂承大統恭依遺詔於洪

武三十一年閏五月十六日卽皇帝位夙夜祇懼思

所以克相上帝寵綏四方以無忝我皇祖之大命求
惟寬猛之宜誕布維新之政其以明年爲建文元年
大赦天下於戲德惟善政政在養民當遵先聖之言
期致雍熙之盛百辟卿士體朕至懷 是日葬孝陵

丙申詔內外五品以上文官及縣令薦賢才定保舉
連坐法 六月 上大行皇帝謚曰聖神文武欽明

啓運俊德成功統天大孝高皇帝廟號太祖追謚孝
慈皇后曰高皇后 議革冗員以中書舍人蹇義爲
吏部右侍郎戶部主事夏原吉爲本部右侍郎以平
江知縣陳彥回爲徽州府知府 命兵部尚書齊泰

太常寺卿黃子澄預叅國政 秋七月以董倫爲禮

部侍郎兼翰林院學士倫字安常東昌恩縣人世僑

居宛平遨遊山林間布褐藜藿淡如也敦厚有學學

者多從之遊勝國時累辟不起國初擢用單縣儒士

張寧寧以倫薦遣使徵爲春坊贊善事懿文太子陳

說忠厚太祖聞而善之擢左春坊大學士太子薨出

爲河南叅議留情民瘼嘗上封事數千言皆當太祖

心尋以誑誤免官典教滇南至滇開心訓化不忍鄙

夷其人雖蠻童蕪豎皆知向慕帝即位眷念舊臣召

至京師遂有是擢賜御書怡老堂三字及綵几玉鳩

各一倫上表稱謝畧云桓榮設几杖於大常而不聞
有宸翰之賜晏殊題舊學於神道而不見有几杖之
頒自今將杖以戒噎則當思四海或有饑餒之民憑
几以安身則當念一物或有失所之嘆 上甚嘉之
召漢中府學教授方孝孺爲翰林院侍講 命曹國
公李景隆卽訊周王橚逮至京廢爲庶人 以王紳
爲國子監博士紳字仲縉先翰林待制禕之子也禕
使雲南爲元孽梁王所殺時紳年甫十三聰敏過人
善屬文與兄綬事母盡孝及母卒哀毀踰禮未幾綬
亦歿紳乳乳憂患中綜理生業而傑然負奇志暇日

益取經史百氏窮其指歸宋濂一見器之曰子充有
後美蜀獻王聞其賢幣聘賓禮教授蜀郡紳痛父遺
骸未返丘壟白其情事王憫之給道里費以行至雲
南訪求不獲即死所哀莫號慟幾絕道路悲之至是
給事中徐誠御史黃凱薦之遂有是擢 以張鳳等

爲錦衣衛千百戶等官有差初太祖崩于西宮宮人
殉葬者若干人張鳳李衡趙福張弼汪濱孫瑞王斌
楊忠林良李成張敏劉政等皆殉葬者之家故以是
官俾世世承襲 八月進魏國公徐輝祖曹國公李
景隆祿秩勅輝祖練兵山東 召王景彰爲禮部右

侍郎兼翰林侍講尋陞學士 徵江西處士楊士奇

充實錄編纂官尋授齊府審理副仍留編纂 罷禮

部尚書鄭沂以雲南右布政陳迪代之 以臨江府

推官劉翼爲知府 以劉儵盧淵爲兵部左右侍郎

以何福爲征虜將軍總兵征百夷都督徐凱副之

增國子監司業一員 九月 罷築銅鼓衛城召徐

輝祖吳傑還京 長星西隕有聲如雷 雲南總兵

西平侯沐春卒弟晟襲爵 以馬京爲大理卿 冬

十月熒惑守心 征虜將軍何福進兵金齒討諸蠻

平之 增置陝西洮州茶馬司 以戴元禮爲太醫

院使元禮學于朱彥脩以御警事太祖大漸時常目之曰此人仁義 上記憶之故有是命 召北平總

兵都督楊文還京 十一月 詔顧成班師先是成

以都督僉事充征南將軍帥師征水西蠻旣又征五開所向克捷至是征平洲六洞等長官司一百三十七砦皆平之悉撫諭復業師還駐常德待命詔諭班師比還京賞勞成及其副將何清宋晟韓觀有差

十二月癸丑朔帝如郊壇明年將有事南郊故特至省牲滌器嚴飭百吏禮畢還宮 以吏部尚書茹瑺

掌河南布政司事尚書如舊以雲南左布政張統爲

吏部尚書 以王鈞爲戶部尚書鄭賜爲工部尚書

黃福爲右侍郎 詔以監察御史尹昌隆奏疏頒示

天下時帝視朝稍宴昌隆諫曰昔太祖高皇帝雞鳴

而起昧爽而朝百官戒懼故能庶績咸舉天下乂安

陛下嗣守大業正宜追繩祖武兢業萬幾未明求衣

日旰忘食常如不及斯爲庶幾今乃日晏臨朝羣臣

宿衛疲于伺候曠職廢業上下懈弛臣恐播之天下

傳之四夷非社稷之福也 上曰昌隆所言切中朕

過禮部可徧行天下不惟使朕有過人得而知之且

俾天下庶官咸能勤于趨事也 謫監察御史解縉

於河州初縉舉洪武戊辰進士以中書庶吉士改御史累上封事指斥時政兵部尚書沈璿疾之太祖謂縉年尚少命其父挈歸鄉里臨行語之曰十年後來朕必用汝未及期而太祖崩縉遂奔喪京師時縉母喪未葬父年九十矣有司以非詔旨謫河州衛吏或言其爲左右所中云 以韓宜可爲都察院副都御史程本立爲左僉都御史曾鳳韶爲監察御史 召宋懌還京師懌故翰林學士濂之孫濂嘗授先懿文太子經帝念之召懌復官翰林侍書 詔求直言令內外羣臣各舉山林巖穴懷材抱德之士 遼州人

高巍事母至孝母老疾巍奉湯藥不懈母亡廬墓三年洪武壬戌貢入太學以孝行旌尋授督府斷事上疏欲墾河南山東北平兵後荒田及抑末技慎選舉惜名器數事太祖以斷事不稱旨尋謫戍貴州帝即位上疏乞歸田里知州王欽應詔辟巍赴銓曹巍上書論時政其畧曰今欲弱侯王定經制俾萬世無疑臣請借漢爲喻漢高起布衣摧秦滅項以定禍亂遂大封同姓分王天下之半蓋欲藩四夷而禦中國也豈其遺文帝不治之痼疾哉故賈誼脛腰指股之喻痛哭流涕之嘆無非欲削六國之意也賴文帝寬厚

含容而吳王几杖之賜折其強悍不臣之心迨厲王
謀反僅廢處蜀郡已不免有尺布斗粟之謚景帝寬
厚不如文考又晁錯輔以刻深徑削諸侯遂挑六國
之禍非文帝付托得人民心輔漢幾危社稷是晁錯
不能辭其責矣我太祖皇帝起類漢高而神武過之
龍飛淮甸汎掃胡元芟刈羣雄混一區宇四征不庭
所向克捷際天薄海絕塞窮荒三皇五帝之所不能
服者莫不納貢輸忱爭先恐後雖曰天與人歸實賴
我高皇帝有文王純一之德大行皇后有后妃不妬
之行則百斯男無不穆穆皇皇宜君宜王者矣故本

宗百世爲天子支庶百世爲諸侯體三代之封建分
茅胙土先封形勢之地陝西百二山河其人勇悍西
隣土蕃以秦府王之山西表裏山河其人剛壯北近
胡虜以晉府王之北平雖無名山大川之限而桑土
沃饒廣畜羊馬其人衣皮食肉弓馬是務遼金元藉
之各興一代之業故以燕府王之四川雖曰西南一
隅山河阻深劉備諸葛亮據之而虎視吳魏者也故
以蜀府王之其餘楚湘齊交寧遼谷代慶肅星羅碁
布比之前古雖皆分封過制而高皇帝之聖謨神慮
莫非欲護中國而屏四夷也今各處親王固多驕逸

不削則朝廷紀綱不立削之則傷親親之恩此我皇上之所難處也以臣愚見不當聽晁錯削奪之策當行主父偃推恩之令秦晉燕蜀四府子弟分王於齊交楚湘齊交楚湘子弟分王於秦晉燕蜀其餘寧遼谷代慶肅等府類此而分王之少其力而分其地如此則藩王之權不削而自弱矣臣又願皇上待遇親王薄其貢而厚其恩常盡親親之禮其賢如漢之河間獻王與東平王蒼者下詔褒賞之其驕逸不法如漢之淮南濟北者初犯則容之再犯則赦之三犯而不改者當合親王告太廟削其地而廢處之豈有

不順服哉臣嘗以爲人君之有天下亦如人之有一身也天下之患有內外一身之疾有皮膚四夷之患人身疥癬之疾骨肉之患人身腹心之疾疥癬之疾有時搔癢命良醫脩方一掃之而平服矣腹心之疾非智識膏肓者不能也昔賈誼見漢諸侯強盛故假指股爲喻今臣以一身百體爲譬我皇上乃天君一心也所謂具衆理而宰萬物百體之從命者也各處親王乃五臟耳目口鼻手足也五臟酸甜嗜欲不同手足安逸亦異目好色耳好音鼻好臭口好甘皆本乎心天君隨其百體之好則失主宰之道不隨則擾

亂吾心故醫書云智者能調五臟和既和不惟無腹
心之疾而疥癬之疾亦不生矣噫五臟和而一身安

一家和而百事遂里諺曰家不和而隣欺臣亦謂國
不和而四夷窺此一理也伏望皇上鑒察焉未逾年
比平兵起以工部右侍郎張昺掌北平布政司事

謝貴張信爲北平都指揮使時諸藩不靖廷臣建議
凡藩國所在悉更置守臣必素負重望者居之乃以
昺爲北平布政黃子澄齊泰計將削奪燕藩故以貴
等爲北平都司俾通王府官屬以覘察動靜調僉
都御史劉觀爲嘉興知府盡釋刺面軍及囚徒還

鄉里

憲章錄卷第十二

憲章錄卷第十三

革除建文元年巳
卯至二年庚辰

元年春正月庚辰大祀天地於南郊始奉 太祖高

皇帝配 昧爽祀畢還宮御奉天殿受羣臣賀方孝

孺進郊祀頌 詔養老賜高年米絮帛有差 命官

贖民粥子減田租 遣使告卽位于天下神祇 何

福班師還京 勅脩 太祖高皇帝實錄禮部左侍

郎兼翰林學士董倫右侍郎兼翰林學士王景彰爲

總裁官太常少卿廖昇翰林侍講學士高巽志爲副

總裁官國子博士王紳漢中府學教授胡子昭齊府

審理副楊士奇崇仁縣學訓導羅恢馬龍他郎甸長
官司吏目程本立等爲纂脩官 二月 都督韓觀
練兵於德州 詔尊皇考懿文皇太子爲孝康皇帝
廟號興宗皇妣懿敬皇太子妃呂氏爲孝康皇后擇
日祔廟 冊妃馬氏爲皇后 封弟允熲爲吳王允
燧爲衡王允燾爲徐王 立子文奎爲皇太子 詔
薦賢養老墾田興學考察官吏旌孝賑貧掩骼埋胔
贖民鬻子減田租 令親王不得節制文武吏士
進封江都郡主爲公主以儀賓耿璿爲駙馬都尉
都督僉事宋晟總兵鎮守甘肅 以周是脩爲衡府

紀善 更定官制 北平按察副使張璉坐藩府事

謫典史北平右布政使曹昱坐罪削籍 是月燕王

來朝行皇道入登陛不拜監察御史曾鳳韶劾王不

敬戶部侍郎卓敬上書論劾皆不報 免民賃舍錢

革松礮衛 三月 帝祀先師於太學盥獻拜跪禮

如廟社御彝倫堂見師生賞幣鈔有差 以散騎常

侍張成等七十一人爲海上巡檢 勅布按二司官

糾察屬吏 革畧陽縣 是月燕王還國燕世子及

其弟高煦高燧留京師未幾遣還北平俄北平按察

僉事湯宗上變告言按察使陳瑛密受燕府金錢有

異謀逮瑛安置廣西燕山左護衛百戶倪諒亦上變
告逮府中官旗于諒周鐸等伏誅遂勅都督宋忠率
兵三萬及燕府護衛健卒屯開平名備胡都督徐凱
練兵臨清都督耿獻練兵山海關 召燕府胡騎指
揮關童等還京 調北平永清兩衛官軍屯彰德順
德 戶部右侍郎夏原吉都御史暴昭給事中徐思
勉等二十四人充採訪使巡行天下問民疾苦興廉
黜貪得便宜行事 京師地震監察御史尹昌隆上
疏言奸人專政陰盛陽微謫見于天執政大怒斥爲
福寧知縣 夏四月 革南丹衛附慶遠 召湘王

栢於荊州栢自焚卒 齊府人曾名深上變告召齊

王搏至廢爲庶人留京師誅其護衛指揮柴真等未
幾幽代王桂於大同繫岷王榘於雲南並廢爲庶人
當是時燕府威名最盛於諸王最長地勢形便兵力
又最強朝廷深疑之齊泰黃子澄徐輝祖侍郎卓敬
日夜謀所以防燕者長史葛誠教授余逢辰亦稍洩
其謀張昺謝貴馬宜彭二每遇中朝使者至北平亦
頗傳語曰謂宜早爲備燕王固知之自京師歸即托
疾久之遂稱病篤大暑圍火爐搖顛曰寒甚寒甚官
中亦杖而行朝廷稍不爲意識逢辰密生曰昺貴曰殿

下本無恙公等勿解防恐一旦不可測也而三都督
密謀益急 五月 選補儒學官先是學官缺用舉
人及中試監生通經儒士至是詔天下凡在任未入
流官及坐法謫戍已更者但通經薦試俄又詔衛官
舉通經軍士聽布按二司試上吏部銓用 岳池教
諭程濟上書言某月某日西北兵起大難在宗室中
朝廷謂非所宜言逮至京將殺濟召入仰面大呼曰
陛下且囚臣至期無兵臣死未晚遂下之獄 以戴
德燹爲左拾遺宋徵爲宗人府經歷錢芹爲戶部司
務王叔英爲翰林脩撰 六月 省興濟縣入青縣

置千戶所於戎縣 以開平王甥趙諒爲留守左衛

指揮僉事 是月召解縉于河州以爲翰林待詔

秋七月 甲戌 燕府兵起號靖難北平掌布政司

事侍郎張昂都指揮使謝貴彭二燕府長史葛誠教

授余逢辰死之遂奪省城九門都指揮使俞瑱走居

庸關馬宣走薊州宋忠率師至居庸關退保懷來留

瑱守關 燕府上書言 皇考太祖高皇帝艱難百

戰萬死一生定天下成帝業傳之萬世封建諸子輩

固宗社爲磐石安不幸皇考賓天陛下嗣承大寶而

姦臣齊泰黃子澄輩包蓄禍心恣讒奮毒假陛下之

威權剪皇家之支葉櫛椽栢桂櫬五弟不數年間並
見削奪雖有愆過未聞不軌輒削王爵奪王土轉徙
流離行路矜惻栢尤可憫闔室自焚聖人在上胡寧
忍此蓋非出陛下之心皆姦臣所爲也心尚未足又
以加臣臣守藩于燕二十餘年寅畏小心奉法循分
陛下嗣統以來臣事君之誠明於皎日誠以君臣大
分骨肉至親怛思加慎爲諸王先而姦臣跋扈蔽陛
下之聰明誣直爲枉加禍無辜執臣奏事人箠楚刺
焚備極苦毒迫言臣謀不軌遂分布宋忠謝貴張昂
等於北平城內外甲馬馳突於街衢鉦鼓喧鞠於遠

邇園守臣府周匝嚴密小大凜凜如臨湯火已而護
衛人執貴曷始詢知姦臣欺詐之謀號地呼天擗踊
無訴竊念臣於懿文皇大子同父母兄弟也今事陛
下如事天也擢姦之心不止害臣譬伐大樹先剪附
枝親藩夷滅朝廷孤立姦臣得志社稷危矣伏望陛
下廓日月之明奮雷霆之斷渙發德音去此兇慝以
肅清朝廷以求安宗社以保全親藩遙仰天門敬據
愚懇惟陛下念之臣又竊計姦權之黨必已蟠結深
固恐陛下未易除之伏覩祖訓有云如朝無正臣內
有姦惡則親王訓兵待命天子密詔諸王統領鎮兵

計平之臣謹府伏俟命惟陛下念之念之 甲戌通

州衛指揮房勝以城降燕 丙子北平都指揮使馬

宣起兵薊州攻北平不克死之毛指揮遂以薊州降

燕遵化衛指揮蔣玉密雲衛指揮鄭亨又各以其城

降燕 巳卯俞瑱師潰明居庸退依宋忠於懷來

甲申燕府攻懷來忠敗績及瑱被獲都指揮彭聚孫

泰戰死都指揮莊得敗走 丙戌求平指揮趙彛郭

亮以城降燕 庚寅大寧總兵劉貞都督陳亨都指

揮卜萬引大寧兵號十萬出松亭 駐沙河進攻遵

化 壬辰燕府援遵化貞等退保松亭關亨陰輸款

於燕忌萬不敢發燕府間萬貞亨縛萬下獄聞於朝籍萬家是月以長興侯耿炳文爲征虜大將軍驍馬都尉李堅都督審忠爲左右副將軍帥師北進詔天下曰朕奉高皇帝遺詔纂承大統宵衣旰食思圖善以安民豈意國家不幸骨肉之親屢謀僭逆去年周庶人橚潛爲不軌辭連燕齊湘三王朕以親親之故不忍暴其過止正橚罪餘皆不問今年齊王榑謀逆事覺推問犯者又言與湘王栢燕王某同謀栢自知罪惡難逃先已自焚死榑已廢爲庶人朕以某王於親最近未忍究其事今乃稱兵犯闕不得已遣

長興侯耿炳文等率兵三十六萬往討其罪咨爾中外臣民軍士各宜懷忠守義與國同心永安至治祭告天地宗廟社稷書諭諸王削燕屬籍時帝方銳意文治日與方孝孺等討論周官法度以爲北兵不足憂黃子澄謂北兵素強且兼有營薊之旅不早禦之恐河北遂失又請命安陸侯吳傑江陰侯吳高都督都指揮盛庸潘忠楊松顧成徐凱李文陳暉平安等各率偏師步騎號百萬數道並進期直搗北平撤山東河南山西三省合給軍餉省碯嘉臨西驛寧三縣和曲祿勸二州勅令京朝官請告歸省給勅各

于內府 以京口驛隸京師 睢陳歸德三州直隸

河南布政司 徵謫戍指揮僉事伏願等入京復其

官 赦程濟出獄擢爲翰林編脩充軍師護諸將北

行 置平燕布政使司于真定刑部尚書暴昭掌布

政司事 贈故翰林待制王禕爲翰林學士謚文節

封李堅爲灤城侯 徵雲南兵入京備征 八月

耿炳文兵三十萬至真定都督徐凱兵十萬駐河間

都督潘忠揚松先鋒駐鄭州 壬子中秋夕燕府率

衆渡白溝河圍雄縣破其城盡殺守陣卒屠其民潘

忠揚松兵渡月槎橋接戰遇伏大敗被執燕府遂進

至鄭州奪戰馬輜重炳文部將張保降燕言炳文兵三十萬先至者十二萬分營滹沱河南北燕府厚撫保遣歸詐言兵敗被執幸守者困得脫竊馬歸又令言雄鄭敗狀燕兵旦夕且至令河南兵北移得併力破之易炳文聞保言果移南營過河 壬戌燕府至

真定炳文出城逆戰敗績兩副將軍李堅竄忠及都督顧成何托都指揮劉燧皆被執成降燕 丙寅燕

府攻真定不克還北平 是月以曹國公李景隆為征虜大將軍馳至軍中會諸將北進帝聞耿炳文敗績始有憂色謂黃子澄曰柰何子澄對曰勝敗兵家

常事無足慮今天下全盛士馬精強兵甲堅利糧餉充足區區一隅豈足當天下之力調兵五十萬四面攻之衆寡不敵必成擒矣曰孰堪將者子澄曰李景隆可以當之前不用耿炳文而用景隆豈有此失遂遣景隆代炳文以高巍叅贊軍務魏復上書言臣願使燕披忠膽大陳義禮曉以禍福及親親之誼遂遣往燕巍自稱國朝處士臣某上書燕國大王其詞曰志慕仲連子善與人排難解紛名世不朽我太祖升遐遺詔內外臣民同心輔政我聖明天子嗣登寶位誕布維新之政下養老之詔天下感戴奚啻考

妣朝野皆曰內有聖明君王外有骨肉藩翰帝王之治可待不意大王與朝廷有隙張皇三軍抗禦六師竟不知其意何出在朝諸臣執言仗義以順討逆臣以爲動干戈孰若和解使帝者復帝王者復王君臣之義大明骨肉之親愈厚臣所以得奉明詔置死度外來見大王欲盡一言求頸血汚地者稱臣宿許太祖生當殞首死當結草之願也昔周公聞流言卽避位居東若大王始知謀逆者擒送京師或戮而奏聞或解其護衛或質所愛子孫釋骨肉猜忌之疑塞讒賊離間之口不與周公比隆哉慮不及此遂檄遠邇

大興甲兵襲疆宇任事者得藉口以爲殿下假誅左
班文臣實欲效漢吳王倡七國以誅晁錯爲名家必
自毀然後人毀之恐一奸雄豪傑鳩集無賴因時乘
機率衆數萬突起而橫擊之萬一有失大王獲罪先
帝矣今大王據北平取密雲下永平襲雄縣掩真定
易若建瓴但自興兵以來經今數月尚不能出區區
葦爾一隅之地較以天下十五而未有一焉大王將
士殆亦疲矣况朝廷天下無限之師大王以一國有
限之衆應之大王同心之士大約不過三十萬大王
與我聖天子義則君臣規則骨肉尚生離間之疑况

三十萬異姓之士可保終身困迫而死於殿下乎大王信臣言上表謝罪按甲休兵朝廷寬宥再脩親好天意順人心和太祖在天之靈亦安矣不然執迷不回僥倖悖事恐與伯夷叔齊泰伯仲雍求仁讓國之義徑庭矣幸而兵勝得成後世公論謂何倘有蹉跌取譏萬世於是時也追復臣言可得乎魏白髮書生蟬蛻微命生死不懼者但久蒙太祖教養無能補報洪武十七年旌表愚臣孝行臣竊自負既爲孝子當爲忠臣死忠死孝臣至願也書再上不報 谷王穗自宣府還京齊泰等慮遼王植寧王權通燕召二

王還京遼王至寧主不至徙封遼王於荊州詔削寧
王護衛 御史韓郁上書言諸王親則 太祖遺體

貴則孝康皇帝手足尊則陛下叔父使二帝在天之
靈子孫爲天子而弟與子遭殘戮其心安乎臣每念
至此未嘗不流涕也此皆豎儒偏見病藩封太重疑
慮太深而至此夫唇亡齒寒人人自危周王旣廢湘
王自焚代府被摧而齊臣又告王反矣爲計者必曰
兵不舉則禍必加是朝廷執政激之使然燕舉兵兩
月矣前後調兵不下五十餘萬而一矢無獲謂之國
有謀臣可乎經營已久軍需輒乏將不効謀士不効

力徒使中原無辜赤子困於轉輸命不聊生日甚一日九重之憂方深而出入帷幄與國事者方且洋洋自得彼其勸陛下必削藩國者果何心哉諺曰親者割之不斷疎者續之不堅殊有理也陛下不察不待十年悔無及矣臣雖至愚感恩至厚不敢不言幸少垂洞鑑興滅繼絕釋代王之囚封植湘王之墓還周王于京師迎楚蜀爲周公俾其各命世子持書勸燕罷兵守藩以慰宗廟之靈明詔天下撥亂反正篤厚親親宗社幸甚不聽 九月 江陰侯吳高都指揮耿璣楊文帥遼東兵圍永平大將軍李景隆乘傳至

德州山東叅政鐵鉉調兵食景隆合兵五十萬進營
河間燕府率衆援永平高等退保山海關安陸侯吳
傑兵潰於真定傑遁還京謫爲南寧衛指揮使 冬
十月 燕府出劉家口襲破大寧都指揮朱鑑死之
都指揮房寬王權皆降燕 劉貞陳亨自松亭關引
兵來援亨及營州中護衛指揮徐理陳文襲貞破其
營貞遁廣寧浮海還京 李景隆聞燕府攻大寧引
兵渡蘆溝橋攻北平築壘九門景隆攻麗正門幾破
城中婦女並乘城擲瓦石景隆令不嚴驟退北平守
益堅景隆別將攻通州敗績 甲寅燕府盡拔大寧

諸軍及兀良哈三衛明騎挾寧王入於亭關起援北
平 十一月庚午李景隆移營白河西先鋒都督陳
暉渡河而東遇燕府戰敗績景隆七營兵合戰皆潰
景隆盡棄其輜重拔其衆南奔駐德州 癸酉九門
兵皆潰 乙亥燕府再上書言臣叨奉宗藩見惡權
姦橫加大惡上書自陳今歷三月未蒙垂察疊發大
兵討罪不已竊開朝廷論臣有不軌之事八謹陳其
詳惟陛下垂察其一謂臣護衛踰額祖訓職掌條王
府官軍不拘數目各王府皆然此姦臣在臣一也其
二謂臣不當無事操練軍馬祖訓兵衛條王教練軍

士遍數不拘此姦臣枉臣二也其三謂臣不當於各
衛選用官軍祖訓軍職條王府武官千戶百戶從王
於所部軍職內選用開奏直詣御前頒降誥勅此姦
臣枉臣三也其四謂臣私養韃靼健卒本洪武中歸
附處於北平皇考命於護衛歲給衣糧備虜此姦臣
枉臣四也其五謂臣招致各處異人術士養於府中
日夕論議爲非竟無主名此姦臣枉臣五也其六謂
臣府中守禦四門不當僭擬皇城守禦之制更番甚
嚴祖訓兵衛條凡王府守禦宿衛護衛均番此姦臣
枉臣六也其七謂臣官室僭侈此 皇考所賜祖訓

營繕條燕因元之舊非臣僭越此姦臣枉臣七也其
八謂臣第二子高煦過涿州擅笞驛官此臣失教然
笞一驛官遂指爲臣不軌之迹寃濫已甚何以服天
下後世此姦臣枉臣八也且陛下與臣皆出 太祖
高皇帝孝慈高皇后於屬最親姦臣猶待誣以極惡
則踈遠小臣天下細民欲寘死地可望雪理邪其不
濁亂天下傾危宗社不已也蓋今諸王之中臣亨爲
長周齊湘代岷五府已去獨臣未去臣去則楚蜀秦
晉諸國不難去矣寧王無罪此又削其護衛譬諸人
身手足皆去身能全乎伏望陛下鑒臣愚誠思宗社

大計斷然不惑去此姦慝臣某頓首頓首 罪黜都

指揮僉事周成袁成張睦皆降燕 是月燕府傳檄

言我父皇奉天承運華夷一統長子立為皇太子餘

子封王各守藩屏以為子孫萬代計不幸皇太子薨

逝秦晉二王繼殞父皇慈念皇太子遂立其次子為

皇太孫居東宮洪武三十一年閏五月十日父皇賓

天皇太孫即帝位我諸王不敢以叔道尊亢臣子之

情至矣盡矣帝年幼冲任用奸邪小人屏棄典刑殘

害骨肉天變屢見恬不修省此皆齊尚書黃大卿左

班文職等官讒佞于君恣行不道今天下但知有齊

尚書等不知有皇帝皇帝被奸臣惑溺父皇陵土未
乾周代湘齊岷五王相繼竄流齊尚書等又使惡少
謝貴等爲比平都司官張曷爲布政司官與本府長
史葛誠合謀六月圍我王墻柵我王門殺我守王城
卒諸軍披甲執杖鉦鼓叫呼聲震城野七月初旬且
引兵入王城以都指揮張信言洩其奸不得已起兵
擒獲逆賊謝貴等七月十六日擒宋忠殺都指揮孫
泰俞瑛八月十六日破雄縣擒都督潘忠楊松二十
五日破真定走耿炳文擒左副將軍駙馬李堅右副
將軍竊忠右都督顧成何托都指揮劉燧江陰侯吳

高都督耿獻揚文以遼東兵圍永平余直抵永平高
等夜遁還兵大寧都指揮房寬來降殺朱鑑都督劉
貞陳亨守松亭關不肯來降余襲破其營擒亨貞單
騎遁去大寧遂平未幾齊尚書黃大卿等左班文職
又矯詔曹國公李景隆領兵五十餘萬十月十六日
攻北平圍城甚急余以寡敵衆景隆大敗斬首十萬
九千餘級景隆夜遁去余本 太祖高皇帝親子母
孝慈高皇后皇太子親弟忝居諸王之長禮曰父之
仇不共戴天兄弟之仇不反兵今奸臣齊尚書黃大
卿等余必不與共戴天也故欽遵祖訓統兵三十萬

誅討左班文職奸臣傳檄天下藩屏諸王暨官吏軍
民咸使知朝廷左班文職奸臣大逆不道我父皇之
仇爲子者義在必報也 省平夷衛 十二月燕間
遼東守將吳高削爵徙廣西專命楊文守遼東 庚
申燕府攻廣昌守將楊宗以城降 是月岷府典膳
李英等伏誅 蘄州鎮撫曾璿起兵攻北平不克死
之 駙馬都尉王寧謀叛幽于其家 衛官張倫等
率兩衛官軍南奔結盟報國 以練子寧爲吏部左
侍郎茹瑄復爲兵部尚書 初令武官襲替兵部會
五府取旨是時掌中府事駙馬都尉謝達署左府事

孝陵衛指揮使黃鉉右府都督僉事陳春掌前府事
駙馬都尉耿璿掌後府事駙馬都尉尹清 罷齊泰

黃子澄留京師 省躬殿成殿在乾清坤寧二宮間

爲退朝燕息之所置古經聖訓其中以尚父丹書之

旨夏書聲色宮室之戒命方孝孺爲銘 以表義爲

右府都督僉事 遷肅王楨於蘭縣 選募謀勇以

中牟人楊本爲錦衣衛鎮撫沅州人周拱元爲所鎮

撫 法司奏今歲論囚視往歲減十三 留守左衛

指揮同知李申伏誅籍其家 叅贊大將軍軍務高

魏使燕 署應天府事兵部郎中方賓誦戍廣東

以錢芹爲行軍署都事茅大芳爲副都御史葉砥爲翰林編脩顏伯瑋知沛縣胡儼知桐城縣梁潛知陽春縣

辰庚

二年春正月丙寅朔天下官來朝免賀 燕府攻蔚州守將王忠李遠以城降 省翁源縣入英德 初置後湖祗候所 二月 降漢陽府爲州 丁酉燕兵攻大同 壬寅詔禮部尚書陳迪右侍郎黃觀知貢舉翰林學士董倫太常少卿高遜志充考試官右拾遺朱逢吉史官吳勤葉惠仲趙友士徐旭張秉彝爲同考試官御史王度俞吉士爲監試官 降南雄

府爲州省保昌縣 令蘇松江浙人得官戶部 甲

子改都察院爲御史府革十二道置察院一詔曰頃

以治獄煩興易御史臺號都察院與刑部分理庶獄

今賴宗廟神靈斷獄頗簡其更都察院仍漢制爲御

史府專糾貪殘舉循良匡政宣教化爲職省御史員

定爲二十八人務爲忠厚以底治平改都御史景清

爲御史大夫以監察御史戴德燹爲左拾遺以黃觀

爲禮部侍中掌尚寶司事 是月鞬鞞可汗坤帖木

兒瓦刺王猛哥帖木兒款北平李景隆率兵出紫荆

關援大同 燕府自居庸關還北平景隆遺書燕府

請息兵王答書索齊泰黃子澄 三月丙寅朔日食
策試禮部中式舉人 賜胡靖王良李貫等一百一
十人進士及第出身有差以靖等三人並授翰林脩
撰廷試策良最優以貌不揚易靖第一靖初名廣
上特爲易名後復名廣與同榜楊榮金幼孜楊溥胡
濙顧佐陳洽皆爲永樂時名臣唯良死建文之難故
曰以貌取人失之子羽良貫皆吉水人貫獨不類君
子耻之 令禮部乙榜舉人署教諭訓導年未三十
不願署教者聽 省忻城縣併入東蘭縣 武臣犯
法被黜者悉叛走降燕燕盡復其故官 夏四月

李景隆兵次德州郭英吳傑等兵次真定約日合兵
進攻北平先是 上遣中官賜景隆璽書及斧鉞渡
江忽大風雷雨暴至舟破盡沉諸江至是復賜景隆
益專恣紀律不嚴號令煩數諸將易玩之 辛丑燕
師渡馬駒橋南駐武清癸丑李景隆軍至河間先鋒
叅將平安至白溝河郭英等自真定移營保定期會
於白溝河 燕師進至固安乙卯營中大雨平地水
深二尺 己未燕師渡白溝河平安伏精兵萬騎邀
擊燕王曰平安豎子往從吾出塞征胡識吾用兵以
故敢爲先鋒今日吾且破之使心膽俱喪安驍勇善

戰互有勝負俄都指揮何清陣動戰敗被執安收兵
還營李景隆胡觀郭英吳傑等合兵六十萬聯營白
溝河藏火器一窠蜂掃馬丹于地中人馬遇之輒爛
夜與燕兵大戰燕府從三騎殿後逃失道下馬伏地
視河流辨東西始知營在上流倉卒渡河而北 庚
申燕師渡河胡騎三百叛降燕燕胡騎指揮省吉盡
掩殺之是日李景隆諸軍進戰破燕後軍房寬狼狽
走燕師復戰驍將瞿能父子皆戰沒李景隆麾諸騎
兵乘敵後燕府見張玉朱能丘福陣動急又見陣後
塵起曰敵繞出我後矣馳騎赴之戰甚力左右曰敵

衆我寡難與持久宜退就玉等併力景隆等呼噪益
進矢石俱發注如雨燕府馬三易三被創矢三服並
射盡乃持劔奮擊劔又缺折急走登隄伴麾鞭若招
後繼者景隆等疑有伏不敢上隄而燕兵復馳入陣
陣動會旋風折大將旗景隆軍大亂燕兵乘風縱火
燔諸營郭英等潰而西景隆潰而南委棄輜重器械
孳畜萬萬計景隆璽書斧鉞盡爲燕所獲殺溺死者
二十萬人 燕兵復追至月樣橋降十萬餘人景隆
單騎走德州 壬戌燕遣人攻德州 五月辛未李
景隆自德州奔濟南癸酉燕將陳亨張信入德州奪

軍餉百萬轉掠濟陽儒學教諭王省坐明倫堂伐鼓聚諸生曰堂名明倫且勿多論只說君臣之義何如省大哭諸生亦哭遂以頭觸柱死之 參贊高巍遇

參政鐵鉉於臨邑相持慟哭共誓效死遂趨濟南守城 丁丑燕師迫濟南己卯李景隆出兵合戰城下敗績奔入城燕兵以箭射書城中使急降濟陽生員高賢寧作周公輔成王論射城外請罷兵 燕師圍濟南攻之急鐵鉉高巍徐盛統兵悉力防禦大挫燕衆 辛巳燕兵隄水灌濟南濟南人大懼鐵鉉曰無恐計且破之不三日遁矣令登陴人皆哭呼曰旦日

且降盡輟守具出千人城外伏地請降又請退兵十里無驚動城中人燕府大喜是時燕府在軍逾年往來戰守甚苦僅得永平保定及北平三府諸府縣旋破旋堅守不降至是聞濟南降曰濟南中原要會得濟南斷南北卽不下金陵畫中原自守可以徐圖江淮遂下令退軍受降軍中大喜呼萬歲鐵鉉懸鐵板城門上伏壯士圍堵中約候燕府入城呼千歲卽下鐵板拔橋乃遣人請燕府入城撫諭燕府乘肩輿張蓋率勁騎數人渡橋直至城下城門開守埤者皆登城伏堵比其入門門中人卽呼千歲鐵板亟下傷燕

王馬首燕王棄馬取從馬走走至橋橋下伏兵發斷橋橋不可動燕王得過橋復合兵圍濟南鐵鉉令守陴者罵燕燕軍大怒攻益急鐵鉉隨機應敵間出兵累敗燕兵 是月都督僉事朱榮棄師遁還京誅之

六月增改詹事府官置資德院 八百媳婦國入

貢 遣監察御史周觀政監徐州兵 是月遣尚寶

司丞李得成使燕議罷兵 以儀賓魯瑄褚富署都

督僉事 秋七月 李得成還自濟南下獄既而釋

之 平安率兵二十萬進次單家橋欲分兵出御河

奪燕餉舟 復德州 高燧出軍良鄉平安兵不故

進 省沔縣入褒城 八月戊申濟南圍解 盛庸

兵至德州逐燕將陳旭自德州遁歸北平 承天門

災詔求直言未幾乙字庫災改謹身殿爲正心殿置

學士一人 罷華蓋文華武英殿文淵東閣大學士

各設學士一人 改方孝孺爲文學博士 九月

承天門成改爲臯門遂改午門爲端門端門爲應門

前門爲路門 乙丑燕王至北平 冬十月 更定

歷事監生選用法凡歷事一年爲滿考分三等上者

卽授官次下者再歷一年復考考上者亦卽授官次

量材選授下還國子監讀書 省兩當縣入徽州

置威武中衛募健武充衛壯士 兵部右侍郎盧淵
有罪除名 清遠戍卒羅義上書下獄既而釋之

詔諸將無使朕負殺叔父名 是月平安與燕兵戰

華山斬燕將陳亨時安及吳傑駐定州盛庸駐德州

徐凱陶銘城滄州相爲犄角因北平滄州城潰凱銘

督士卒脩城燕兵佯出攻遼東至通州循河而南渡

直沽晝夜兼行至滄州城下列營凱等始覺倉卒收

築城具出戰敗績入城守燕兵攻破其東北凱及都

督程暹都指揮趙濟胡原李英張傑皆被執時降燕

者數萬人北將譚淵夜殺降卒三千人凱等皆降赴

北平 封盛庸歷城侯 以鐵鉉爲山東布政使帝

以濟南完守賞鉉等却敵功命翰林陳檢討賜銀幣

吏部魯主事頌誥命封三代尋陞鉉兵部尚書官軍

姜貴等五十四人以濟南功陞官有差 召李景隆

還赦不誅 以盛庸爲平燕將軍充總兵官節制諸

軍陳暉平安爲左右副總兵馬溥徐真爲左右叅將

鐵鉉叅贊軍務督諸兵北進 十一月 盛庸駐德

州燕師移直沽之舟至長蘆戰降獲輜重順流而北

燕王自率衆循河而南盛庸出兵襲後不克燕兵至

臨清移屯館陶掠大名焚我軍餉 十二月甲午燕

師至汶上掠濟寧盛庸鐵鉉率兵躡其後營於東昌
先鋒將孫霖營滑口燕將朱榮劉江襲破霖都指揮
唐禮被執霖走 乙卯燕兵至東昌盛庸背城而陣
燕擊其左不動退而衝其中堅盛庸麾兵圍燕王數
重王易服躍馬出西南去燕軍爲火器所乘大敗盛
庸兵大呼噪奮擊殺燕大將張玉丙辰復戰又敗燕
軍步卒先走盛庸乘之殺傷萬計北平震動燕師退
駐館陶盛庸飛檄真定滄德諸將水陸掎角邀燕師
歸路 是月國子助教王紳卒 是歲以徐實爲兵
部署右侍郎以 西叅政劉季篈爲刑部左侍郎

湖廣叅議楊砥言事忤旨謫遼陽 以鐵鉉爲兵部
尚書仍叅贊軍務 詔舉優通文學之士以處士唐
愚士爲翰林侍讀 大理卿馬京坐事謫肅政按察
司副使 以鄒瑾爲大理寺右寺丞

憲章錄卷第十二

憲章錄卷第十四

革除建文三年辛巳至四年壬午

三年春正月辛酉朔凝命神寶成寶方一尺六寸九分帝親定其文曰天命明德表正萬方精一執中宇宙永昌先是帝在儲位嘗夢神人致上帝命授以重寶元年使者還自西方得青玉於雪山方踰二尺質理溫栗二年春正月帝郊祀宿齋宮夕夢若有覩乃驚寤命玉人琢爲大璽冬十二月工成名凝命神寶至是以告天地祖宗爲文宣示遐邇百官稱賀大宴於奉天門頒賞四夷朝使 辛未大祀天地於南郊

明日宴慶成羣臣大歡會賦詩詔頒示天下 歷城

侯盛庸遣人來獻東昌之捷詔諭天下 召齊恭黃

子澄議軍國事 丙子燕府還北平 丁丑享太廟

告捷 二月乙巳燕府復率衆南出巳酉至保定盛

庸合諸軍二十萬駐德州約吳傑平安出真定攻北

平 加禮部尚書陳迪太子少保 以盧迥爲戶部

侍郎 大理左右少卿汪善聞良輔坐事調河南湖

廣肅政按察司副使以鎮江知府薛崑補闕胡閏爲

大理左右少卿 三月辛未盛庸兵至單家橋巳卯

營於夾河 辛巳燕府率兵至夾河庸結陣甚取燕

兵掠庸陣旁火車火銃強弩戰所固而不能動燕
兵退庸出千騎追之燕卽率萬騎步兵半之直薄庸
陣庸陣堅不動燕步卒攻左掖騎兵擣中堅庸始麾
諸軍力戰斬燕大將譚淵燕復以勁騎掩庸陣後燕
將朱能張武等從燕合戰庸軍火器不及發戰盾又
中鐵積相牽不能先後遂却都指揮莊得驍將楚智
皂旗張等皆陷陣戰沒是夕戰酣迫暮各斂兵入營
燕以十餘騎逼庸營野宿明日引馬鳴角穿營而去
以上有詔旨無使余負殺叔父名也諸將相顧不敢
發一矢燕旣還營復嚴陣約戰燕軍東北庸軍西南

自辰合戰至未兩軍相勝負屢退屢進將士皆疲各
坐息少頃復起戰相持不退忽東北風大起塵埃漲
天沙礫擊面庸軍中昏暗不辨咫尺燕兵大呼乘風
縱左右翼橫擊庸軍大敗燕軍追奔至滹沱河庸走
還德州當是時庸恃東昌之捷輕敵謂此舉必破北
平將士咸攜金銀銅器錦繡衣袍口破北平張筵痛
飲至是盡爲燕兵所獲 癸未真定諸將率師駐單
家橋 甲申燕率兵徑趨橋與平安等大戰安擒燕
將薛祿祿脫走吳傑平安初欲與盛庸合勢比出真
定聞庸敗又聞燕散遣徒兒四出索餉遂進兵與燕

降欽州爲縣省陽山縣入連州革鎮番衛 是月

罷兵部尚書齊泰太常卿黃子澄以謝燕 閏三月

乙未燕兵掠真定吳傑移軍滹沱河燕令騎兵過河

上流步卒輜重從下流渡遇傑兵不戰傑移營藁城

燕兵亦至藁城戊戌合戰互有勝負己亥傑與平安

列方陣西南燕攻其東北以驍騎循河出其軍後大

戰傑安發火器大弩射燕矢下如雨集王旗如蝟毛

安陣間縛樓高數丈安登望燕兵見戰勝大喜麾諸

軍力戰燕見安登樓率精騎直趨攻樓安見燕兵馳

至急下樓墜而走會大風發屋拔樹傑軍亦敗都指

揮鄧馘陳鵬等皆被執安傑還真定 已酉燕兵掠

順德辛亥掠廣平癸丑掠大名 是日貽書燕府語

以謫斥齊泰黃子澄可罷兵不聽乃上書曰臣聞虞

舜用辟首去四凶殷湯之聖不吝改過皆帝王之盛

美萬世所師法也臣奉藩以來今歷二紀栗栗不敢

違越皆緣姦臣齊泰黃子澄懷莽操之逆圖志傾危

於宗社造滔天之禍剪藩輔之親屢削諸王次及於

臣誣直爲枉飾虛爲實加大惡月以深誅發天下

之兵殫府庫之財擠臣一家並寘死地臣嘗瀝忠懇

號激訴於天天居甚高畧無見聽夫小杖則受大杖

則走臣雖至愚豈忍父子俱被無辜之戮而令陛下受枉殺親王之名哉故以兵自防誠非得已上賴天地宗廟之靈鑒臣忠誠憫臣非罪俯垂庇佑大軍所至無不摧衄然臣不敢爲喜恒用傷悼誠念此皆

皇考所養兵民而姦臣一旦盡驅之白刃之下使濺血成川曝骸蔽野嗚呼寃哉彼實何罪故夙夜拳拳秉誠攄敬籲天地籲祖考冀開發聖明助震威斷早戮姦賊用除禍本庶幾以清朝廷以安宗社以全親族以息兵民而天下有太平之望比聞姦臣齊奏黃子澄皆已寘逐于外臣一家長幼皆欣喜舞竹有更

生之慶謂陛下日月之明已宣雷霆之威已震朝廷
可以遂清宗社可以綏安親族可望保全生靈可望
休息天下可望太平帝舜之去四凶成湯之改過不
吝陛下兼有之然臣猶未能盡釋於心者臣初聞齊
黃被黜即以徧告三軍將士曰明天子已洞察我之
非辜而去權姦矣且夕必下寬貸洗雪之恩吾與若
等可以解甲而休帖席而卧矣將士皆曰誠所願見
但慮非出誠心而姦臣姑爲退避之計以弭我耳然
我豈可輒自弛以束手就擒哉如其果出誠心則莫
儼平安盛庸之衆當悉召還而今猶聚境上侵迫不

已則是姦臣之身雖出而姦臣之計實行臣思其言
恐亦人事之或然者也夫聖人感人至誠而已至誠
可孚豚魚而况人乎陛下推誠待下誰不悅從若徒
示以去姦臣之名而實仍用姦臣之計此非獨欲撤
陛下之藩籬將遂傾陛下之堂室莽操之事前鑒甚
明此不待智者而後知也姦臣之計臣前書陳奏已
詳如陛下不信但試察其所行所言果忠於朝廷乎
果其自爲乎惟陛下明之於心度之於理參之於古
驗之於今力斷而行之無終爲儉邪所蔽天下幸甚
宗社幸甚非獨臣一家一國之幸也書至 上召方

孝孺視書對曰今諸軍大集燕兵久羈大名暑雨為
疹不戰自罷急令遼東諸將入山海關攻永平真定
諸將渡蘆溝橋擣北平彼顧巢穴歸援我以大軍躡
其後必成擒矣我固欲緩之彼奏適至宜且與報書
往返逾月彼心解而衆離我謀定而勢合上曰善立
命孝孺草詔言罷兵遣大理少卿薛嵩持報燕又為
榜諭數千言刻印萬張授嵩令至燕軍中密散諸將
士嵩見燕王王問上意云何嵩曰朝廷言殿下且釋
甲暮即旋師王怒曰是給我也嵩惶恐不能對燕將
士譁欲殺嵩嵩戰慄流汗伏地王令護嵩南還 翰

林侍讀唐愚士卒 夏四月 崑至自燕軍言燕軍

強盛方孝孺惡之曰此爲燕游說也 五月 吳傑

平安盛庸出兵扼燕餉道燕遣其指揮武勝奉書於

朝曰比荷聖明允臣所奏特遣大理少卿薛崑下詔

軍中諭以偃兵息民雖臣將士不能無疑於權姦之

欺臣之父子蓋已欣戴陛下之仁矣而崑歸未十日

吳傑平安盛庸頻疊發兵絕臣糧運要殺臣將校數

百人臣將士守臣約束不敢赴闕而彼必欲求釁略

不見捨與比所下詔旨背馳誠有以中臣將士之所

疑孤臣父子之所欣幸也如謂朝廷息兵之命傑等

有所不知不聞薛嵩之來往復皆經其軍中其可謂
不知不聞耶此皆奸臣之所爲而陛下深居九重有
所不知不聞也臣之所恃者陛下至尊至親也今爲
姦臣所惡陛下雖有憐之心而不能見庇則臣自
救之計敢一日而忽哉臣之忠誠計薛嵩歸必能詳
達但前日詔旨如此今日姦臣矯制如彼外情洶洶
不敢不聞伏惟擴明奮斷以固皇業以安天下斯臣
亦有保全之望臣無任戰兢俟命之至 上覽書曰
燕王本 皇考孝康皇帝母弟於朕爲叔父柰何必
用兵爲也召方孝孺諭意孝孺對曰陛下即欲罷兵

兵一散即難復聚彼或長驅犯闕何以禦之今軍聲

大振不日有捷書來聞願陛下無惑甘言勝等縛下

錦衣衛獄 改利州直隸廣西 調刑部左侍郎王

良爲浙江肅政按察使 六月 辛酉燕遣李遠等

南掠餉道壬申遠等至濟寧又至沛縣焚餉舟萬艘

河水盡熱魚鱉皆死漕卒散走京師大震 壬午都

督袁宇率兵三萬邀擊李遠中伏敗績 殺觀海衛

指揮張壽壽飲中言國事危急坐妖言論死 遣太

僕少卿祝孟獻使朝鮮市馬 秋七月己丑彰德守

將都督趙清禦燕兵戰敗癸巳燕兵破尾尖寨丁酉

平安邀擊燕將劉江於平村 戊戌遣錦衣衛千戶
張安遺燕世子書先是方孝孺門人林嘉猷嘗被燕
召至北平居邸中久之知高煦及三郡王不睦於世
子屢讒於父內臣黃儼素奸險世子惡儼儼曲事三
郡王三郡王與世子守北平高煦從父軍中時時傾
世子孝孺言於帝曰兵家貴間燕父子兄弟可間而
離也帝問云何孝孺言其故帝曰柰何間之孝孺曰
世子見疑必北歸而吾餉道通矣帝曰善立命孝孺
草書遣張安貽世子令歸朝且許王燕地世子得書
不啓封并安致父所三郡王令儼先已馳使告父世

子且反父疑之問高煦高煦曰世子故與太孫善厚語未竟世子書至燕王曰嗟乎幾殺吾子 壬寅大

同守將都指揮房昭引兵入紫荆關掠保定下邑駐
易州西水寨約期進攻北平燕府聞之即日還兵援
保定 限僧道田人五畝 八月丁巳 燕府渡滹

沱河留其將孟善守保定 丙子真定總兵遣都指
揮韋諒率兵餉饋援房昭 丁丑燕兵圍西水寨遣

其別將朱榮圍定州 是月老撾入貢 放還不識

字人材及年未三十者 改泗城州直隸廣西 九

月甲辰燕兵攻定州 平安兵進攻北平不克還次

真定 倭寇浙東 省恭城縣 降平樂府為州

冬十月丙辰真定諸將都指揮花英鄭琦率步騎三萬援西水寨燕府自定州馳還英等列陣義眉山下燕潛兵出陣後合戰敗績英琦及都指揮王恭指揮詹忠等被執房昭韋諒走西水寨遂破 燕府還北

平 十一月 遼東總兵官楊文園永平燕將郭亮

固守不能克文出兵攻昌黎遇燕將劉江戰敗指揮王雄等七十一人皆被執 平安戰敗燕將李彬於

楊村 韃靼通燕寇鐵嶺 皇少子文圭生 十二

月丙寅 燕府復出北平 勅駙馬都尉梅殷鎮守

淮安 初置豐沛軍民指揮司 詔禁內臣出使侵

凌吏民 吏部試翰林史官楊士奇等以次錄用復

留士奇於翰林 以程通爲遼府左長史龔泰爲禮

科都給事中 太祖高皇帝實錄成 改程本立爲

江西肅政按察副使以兵部武選郎中古朴爲右侍

郎起復陳洽爲文選郎中以徐真馬溥爲左右府都

督僉事充叅將率偏師北進

四年春正月 德州裨將都指揮葛進率步騎萬人

爲先鋒渡濰沱河遇燕將李遠於藁城戰敗 平安

率兵十萬復通州不克指揮賈榮等兵敗于衡水燕

兵攻破東阿戊戌遂破東平指揮詹璟被執吏日鄭
華死之 燕攻汶上都指揮薛鵬被執庚戌燕兵攻
沛縣指揮王顯降燕知縣顏伯瑋及主簿唐子清典
史黃謙死之 置四川英武前衛 設京衛武學
以祭酒張顯宗爲工部右侍郎募兵江西 是月晦
燕兵至徐州 二月諸軍皆營於濟寧餉卒遇敵于
鄒縣潰走 甲戌燕兵攻徐州城中兵出戰敗績
改向武都康州直隸廣西 始置京衛武學教授一
人訓導二人 三月甲申燕兵自徐州進攻宿州平
安統精兵四萬爲先鋒追躡燕兵 壬辰燕兵過渦

河平安兵進至泚河遇伏戰敗胡騎指揮火耳灰哈
三帖木兒皆被執 平安等兵駐宿州燕將譚清斷
徐州餉道燕兵攻破蕭縣知縣鄭恕死之 夏四月
甲寅平安兵營於小河亘十餘里張左右翼綠河而
東遇燕騎兵合戰斬其將陳文再戰又勝斬其將王
真燕王督戰急幾爲安樂所及安馬蹶弗得前燕番
將王麒躍馬入陣援燕王得脫裨將丁良朱彬被執
是役也燕軍中大懼議將還北平平安諸軍營小河
南燕兵據河北甲戌徐輝祖率兵會諸將及燕兵大
戰於齊眉山自午至酉會大霧斂兵還營乙亥燕諸

將欲還北平不敢顯言輒請退屯小河東就麥觀隙而動燕府不聽朱能鄭亨又力言渡河非計諸將多不肯從燕府曰欲渡河者左不欲渡河者右諸將多趨左燕府大怒曰任汝所之諸將始不敢言何福引兵會平安燕軍中益懼燕府數日不解甲矣 丁丑平安營於靈壁燕遮其餉道何福等出壁來援敗績辛巳大戰又敗績左右副總兵都督陳輝平安左右叅將都督馬溥徐真都指揮孫成等三十七人內臣四人禮部侍郎陳性善大理寺丞彭與明欽天監副劉伯完指揮王貴等一百五十人皆被執何福走既

而燕兵縱性善與明伯完貴皆歸與明裂冠裳棄官
變姓名去性善衣朝服躍入河死之 五月己丑燕
府至泗州守將周景初降燕 平卯盛庸率馬步騎
數萬戰艦數千列營淮南燕營淮北燕將丘福朱能
潛濟出庸後庸走盡棄其戰艦軍資燕遂渡淮至盱
眙翰林脩撰王良閉門涕泣與妻子求訣服毒死之
諸將分屯鳳陽淮安以遏燕兵燕欲從淮安取道
渡江以駙馬都尉梅殷守禦嚴備恐攻之不克欲從
靈壁出鳳陽渡淮知府徐安毀橋斂舟不得渡遂徑
趨揚州 庚子燕兵至天長揚州指揮王禮千戶徐

政張勝江都知縣張本執守將崇剛御史王彬降燕
剛彬皆不屈死之 燕兵遂至揚州高郵指揮王傑

降燕 燕兵至儀真 詔天下勤王曰燕兵勢將犯

闕中外臣民坐視予之困苦而不予救乎凡文武吏
士宜即日勤王共除大難宗社再安予不敢忘報詔
下京城內外臣民慟哭遣刑部侍郎金某禮部侍郎
黃觀國子祭酒張顯宗翰林修撰王叔英等分道徵
兵入援召黃子澄還蘇州府知府姚善寧波府知府
王璉率師勤王 遣慶成郡主至燕兵議割地罷兵
不聽 是月遼東兵潰於直沽理問徐讓縣丞衛健

使燕還以爲衛鎮撫軍前差遣 勅刑部尚書侯太

轉餉淮安 燕兵掠鳳陽種馬 六月癸丑朔 燕

兵至浦口諸將盛庸等迎戰 燕王欲且議和北還

會高煦引胡騎至大喜遽起披甲伏鉞見高煦撫其

背令努力高煦死死戰諸軍小却上急遣都督僉事

陳瑄率舟師援盛庸瑄乃降燕 乙卯燕兵遂渡江

盛庸率海艘出高資港嚴陣以待燕王奮力先登大

戰庸敗走鎮江守將章俊降燕 時兵部侍郎陳植

督師江上有督將密議降燕者植責以大義督將恨

之遂殺植率衆迎燕自陳邀賞燕王立誅之具棺斂

植遣官護葬于白石山 庚申燕兵營于龍潭上

遣李景隆都督王佐尚書茹瑺至龍潭再議割地罷
兵分遣諸王守京師諸城門景隆等見燕伏地納款
頓首稱臣呼萬歲不已 壬戌李景隆等歸言燕必
欲得齊秦黃子澄輩 上令景隆等再往言諸臣皆
竄逐外郡俟縛至遣來景隆等惶懼不敢行上令諸
王與景隆等偕行燕府曰勿多言不得奸臣吾必不
已諸王歸上會羣臣慟哭或勸上且幸浙或曰不若
幸湖湘方孝孺請堅守京城以待四方之援議不決
魏國公徐輝祖開國公常昇分道出師禦戰將士離

散不肯向敵翰林脩撰王叔英太常少卿廖昇恟哭
與家人訣自縊死甲子遣人齎蠟書四出促勤王兵
爲燕游騎所獲靖難兵屯金川門上手誅徐增
壽於左順門又欲誅李景隆不果乙丑谷王穗與
李景隆開金川門迎靖難兵入城徐輝祖率師迎戰
敗績安王楹及文武羣臣茹瑞蹇義夏原吉劉儁
古朴劉季篾薛崑董倫王景胡靖李貫吳溥楊榮楊
溥黃淮芮善解縉金幼孜胡濙陳洽方賓宋禮王達
鄒緝楊士奇胡儼等迎附茹瑞先羣臣叩頭勸進許
之遣人布告天下召募丁壯悉令解散是日僉都御

史程本立戶部侍郎郭任禮部侍郎黃冠衡府紀善周是脩大理寺丞鄒瑾御史魏公冕給事中龔泰等死之湏史宮中火起上變服削髮自御溝出至郊壇遁去先是淮上諸將敗上召程濟還京濟善術數至是從上潛行每遇險濟以術脫去相從數十年後隨至京莫知所終 城破之夕高巍縊死驛舍郎官御史給舍相與縊城遯去者四十餘人 燕榜示討左班文職姦臣黃子澄齊泰陳迪方孝孺練子寧黃觀胡閏王鈍盧迥侯泰暴昭鄭賜黃福張統毛泰陳繼之董鏞曾鳳韶王度高翔謝昇尹昌隆宋徵卓敬主

叔英廖昇巨敬不拘軍民人等有綁縛至者量授官
級尋復揭姦臣榜于朝堂增徐輝祖鐵鉉姚善甘霖
鄭公智葉仲惠王璉黃希范陳彥回劉璟程通戴德
燹王良盧原質茅大芳胡子昭韓永葉希賢林嘉猷
蔡運盧振牛景先周璿等五十餘人 方孝孺聞宮
中自焚持斬衰晝夜哭鎮撫伍雲執以獻將用之孝
孺不屈乃下獄遣人再三諭之不從既而召草即位
詔即斬衰入見悲慟徹殿陛燕王曰予欲法周公輔
成王耳孝孺曰成王今安在王曰渠自焚死孝孺曰
成王即不存何不立成王之弟王曰先生無太苦命

左右授筆草詔孝孺投筆于地哭且晉令復繫獄

丙寅諸王及文武羣臣請正天位丁卯諸將上表勸
進戊辰諸王上表勸進己巳燕王謁孝陵還御奉天
殿即皇帝位是日復周王橚齊王樽爵士 壬申葬
建文皇帝初宮中火起時皇后馬氏赴火死及 上
入宮詰問宮人內侍以建文君所在皆指認后尸爲
建文君召翰林侍講王景問墓禮景曰當葬以天子
之禮止從之 命府部等諸司凡建文中所改易洪
武政令條格悉復其舊革除建文年號仍以洪武紀
年是年稱洪武三十五年 贈徐增壽爲武陽侯謚

忠愍

遷興宗孝康皇帝主於陵仍稱懿文皇太子

遷呂太后於懿文陵降封吳王允燾爲廣澤王衛王

允燧爲懷恩王徐王允燾爲敷惠王尋復降允燾允

燧爲庶人允燾改封甌寧王 下徐輝祖于獄革其

祿米 召淮南總兵駙馬梅殷入見上曰都尉在軍

無乃勞乎殷對曰勞而無功徒負愧耳上甚啗之

齊泰被執至京殺之 蘇州知府姚善被執至京上

詰之曰汝一郡守何敢抗我善大聲曰臣各爲其主

耳命殺之善友常熟黃鉞聞善被刑登琴川橋西向

再拜赴水死

黃子溎練子寧執至京併方孝孺皆

磔之逮及親族 宥前御史尹昌隆初靖難兵南下
昌隆上言今事勢日去北來章奏有周公輔成王之
語不若罷兵息戰許其入朝彼既欲伸大義于天下
不應便相違戾設有不虞便須舉位讓之猶不失爲
藩王若因循不斷進退無據雖欲求爲長安布衣不
可得矣不曰及是被執將就刑當陞大呼曰臣曾上
臣勅以位讓陛下奏牘尚存可覆按也 上命停刑
檢其奏流涕曰早從此言南北生靈可免酷禍朕亦
無此勞苦也詔貸其死且命爲北平按察知事 御
使曾鳳韶自殺 兵部尚書鐵鉉擁殘兵駐淮南擒

至不屈令一顧終不可得命磔之 責戶部侍郎卓

敬不奉迎乘輿敬厲聲不遜 上憐其才且繫獄僧

道衍惡敬殺之 初禮部侍中黃觀奉詔募兵上游

且督諸郡勤王至安慶聞變痛哭謂人曰吾妻翁氏

有志節必不辱招覓葬之江上明日家人自京奔至

言翁夫人暨二女同被執有象奴得之索釵釧出市

酒殺夫人急攜二女投淮清橋下死觀慟哭至李陽

河聞建文君避去朝服東向再拜投湍流中死 按

崔銑白建文務滅諸親甚悖矣尾大不掉患可虞也

處之豈無其道燕無不可赦之罪誘其左右與賊其

主此兩國相傾莫之何而用之周則無故圖孤燕勢而翦夫豈九伐之正哉齊黃誤之希直敗之事危矣陽罷策臣謝過陰令起兵于外大根已仆末榦胡濟踏拙行詐殆同兒戲高魏之謀不聽盛庸鐵鉉之武畧不存李景隆之敗劔不辟收刑茂矣舍滅亡何適故曰諸臣死國之忠不足贖其亡君之罪也噫銑之言是或一道也但亡君之罪是其謀猷才識之短未有長君逢君之惡其死國之忠則寔出于降秉秉彝之良而天網人紀之所由植立者也以彼準此庶幾得爲尚論之當云 秋七月壬午朔大祀天地于南

郊大赦唯名在姦臣榜者不宥 罷學士董倫以王
景爲翰林學士 以都督李增枝節制荆襄瞿塘安
陸兵備 以陳瑛爲副都御史太理少卿胡閏不屈
死之 命工部尚書嚴震直等巡視河北諸省 八
月歷城侯盛庸安戢山東都督劉貞鎮守遼東何福
鎮守陝西韓觀練兵江西西平侯沐晟鎮守雲南
召禮部尚書陳廸太常少卿盧原質不屈死之 召
戶部尚書王鈿諭之曰爾向輔建文間朕骨肉今何
顏邪鈿頓首慚謝遂命致仕 執刑部尚書侯天下
錦衣獄死 以蹇義爲吏部尚書夏原吉爲戶部尚

書宋禮爲禮部右侍郎 縛戶部侍郎盧迥就刑迥
不屈長謳而死 鄭賜黃福皆自陳爲姦臣所累乞
宥罪令復其官以茹璫李景隆言并宥張統復爲吏
部尚書統自經於部之後堂侍郎毛太亦死之 以
黃福爲工部尚書 左拾遺戴德彝都御史茅大芳
刑部侍郎胡子昭不屈死之 左僉都御史景清犯
駕磔殺之 得建文時羣臣封事千通命解縉等檢
閱凡言兵食事宜者留覽其詞涉干犯者悉焚不問
因從容問縉及脩撰李貫等曰詞涉干犯者爾等宜
皆有之衆未對貫獨頓首曰臣貫實未嘗有也 上

曰爾以未有爲美耶食其祿當任其事國家危急時
官近侍者獨無一言可乎不必曲自遮蔽也後貫坐
累繫獄十年死 九月大封靖難功臣 詔諭四夷
君長 徙封谷王穗于長沙 廢廣澤王懷恩爲庶
人 初建內閣以待詔解縉爲侍講中書黃淮爲編
脩脩撰胡靖爲侍講編脩楊榮爲修撰吳府審理楊
士奇爲編脩給事中金幼孜桐城知縣胡儼爲檢討
並直文淵閣 逮谷府長史劉璟下獄自經死璟基
之仲子也 冬十月寧王權來朝改封南昌 重修
太祖高皇帝實錄 以僧道衍爲左善世 十一月

新作奉天殿成 以解縉爲侍讀學士胡靖黃淮胡儼並爲侍讀楊榮楊士奇金幼孜並爲侍講 立妃

徐氏爲皇后

以北平左布政郭資爲戶部尚書保

定知府雒僉爲刑部尚書仍掌司府事

陳瑛奏追

治廖昇黃冠王叔英周是修王良顏伯瑋皆不順天

命效死建文計其存心與叛逆等並宜罪上曰彼食

其祿自盡其心耳勿問又曰諸臣盡忠於

太祖故

盡忠於建文但惡其導誘建文變亂成法耳

十二

月以李至剛爲禮部尚書

戒諭靖難功臣

初上

過江時胡廣金幼孜黃淮胡儼解縉楊士奇周是修

約同死難惟是修具衣冠詣應天府學拜先聖畢自
為贊繫於衣帶自縊死於東廡下餘皆負約後縉為
是修作誌士奇作傳因謂其子曰當時吾亦同死誰
與爾父作傳識者笑之

憲章錄卷第十四